

2 San Juan

Gajirãre were gojañumi Ñu. Jesu yare, diaye mahiri sãre wereñumi

¹⁻² Yũhũ bũgũ mũre Goãmũ beyedigore mũ porã sãre ipũre gojabeoa. Jesucristo yare diaye majare opaa mari. Iri mari mera árĩniguicãroca. Eropigũ diaye ta mahia yũhũ mũare. Yũ dihta mahibeaa mũare. Gajirã Jesu yare masirã sã diaye ta mũare mahima. ³ Goãmũ mari Pagũ, Jesucristo ãgũ magũ mera diaye ãgũ mahiri mera marire õaro iigũcumi. Eropigũ marire mojomoro ãagũcumi. Eropigũ marire õaro árĩcũ iigũcumi ãgũ.

⁴ Mari Pagũ marire ãgũ dorediro dopa ta mũ porã yujurãyeri ãgũ yare õaro yũhrirã árĩcũ peebũ. Eropa peegũ mucubiriabũ. ⁵ Eropigũ, acawerego, mari mera majarãre mahi umupeodorea marire. Yũ doreri mama doreriñe árĩbeaa. Iri doreriñe marire mata árĩtuhaya. ⁶ Eropirã Goãmũ dorerire iipehorã mari ãgũre mahia. Eropiro iri doreriñe ãhraa mũa negohrare peerañe. Gajirãre eropa mahiniguicãrã árĩque.

Bajarã gũyaricũrã árĩrãcoma, arĩ werera ãhraa

⁷ Bajarã gũyarã i mũmũ majarãre buherã wahama. “Jesucristo i yebaguere aridigũ masũ dupũ gohra árĩgũ aribiriñumi,” arĩma. Erã gũyarã Cristore ãhaturigũ iro dopa ta iima.

⁸ Eropirã õaro pee masique mua. Muare guyarãre peebiricãque Goãmũ muare ïgu õaro iiburire cóãri arĩrã. Erãre peebiricũ Goãmũ mua õari iira waja obeogucumi muare.

⁹ Árĩpehrerã Jesucristo buherire peenirã irire cóãrã Goãmũ yarã árĩbeama pare. Jesucristo buherire õaro peenururãpũ Goãmũ mari Pagũ yarã àhrima. Goãmũ magũ Jesucristo yarã sã àhrima. ¹⁰ Eropirã mua yujugũ Jesucristo ya buherire gamebigũ gaji buherire buhegu mua pohro eracũ ïgure game bocatĩribiricãque. Mua ya wirigũ ñajadorebiricãque. ¹¹ Gaji buherire buhegu Jesucristo yare umupeobigũ ñero iigu àhrimi. Eropirã mua ïgure bocatĩri serẽrã ñero iidigure itamurã iiaa. Eropirã ïgure bocatĩri serẽbiricãque.

Were gojatura àhraa

¹² Baja yũhũ muare werediaqueregu ta irire paperapũgue gojabeodiabirica. Yũ basi ta muare ïagũ wadiaca. Muare ïagũ weretamugũca mari õaro mucubiriburire.

¹³ Mũ pagũ mago Goãmũ beyedigo igo porãpũ muare õadorema. Iripẽta àhraa.

Goãmu Yare Wereripu
Desano: Goãmu Yare Wereripu New Testament
copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022
17771afc-c309-57fd-9ff3-2d5a0cd59ff1